

祠

部

集

六



祠 部 集
(六)

強 至 撰

王雲五主編

叢書集成初編

祠部集

六冊

中華民國二十四年十二月初版

美

撰者 強 至

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

再上〇四五二

商

祠部集卷三十

書

賀樞密相公書

按璣衡而考度。維斗建寅。揭象魏以班常。俾民觀治。恭惟樞密相公。助高盟府。道濟治朝。才兼文武之資。身繫安危之重。樞廷制勝。以坐鎮于四方。宸扆仰成。茲奮熙于百度。維春祺之所嚮。與歲歷以咸新。某職總計臺。跡疏材館。徒切壽康之祝。阻脩謁對之儀。

賀樞密太尉書

恭惟樞密太尉。元龜先識。隆棟巨材。日宣九德之常。坐制五兵之本。廟謀密勿。已躋天下之安。邦禮論思。愈祕省中之語。遙臨元朔。翕受蕃禧。某總計使臺。馳誠賓廡。瞻風滋劇。介壽無階。

賀省主蔡給事書

蒼靈布序。華歲闔端。肇二氣之泰通。資百昌之咸遂。恭惟首主給事。才包王佐。道貫民彝。名躋日月之高。學破鬼神之奧。瞻中郤之調度。坐懋豐功。渴四海之儀刑。行膺徽冊。發春茲始。介福攸同。某蚤託下風。適提外計。徒敍誠於竿牘。阻馳慶於庸門。

賀省副郭郎中書

恭惟省副郎中薦紳碩望經世偉才蚤登要路之華時各甚盛進貳甘泉之掌風績其凝五始遙臨百祥攸召莫遑爲壽第劇馳誠

賀省副王郎中書

恭惟省副郎中惠和秉哲通裕標才貳職大農兼正列星之位升華近著靡需累日之期順履王正永綏天祿瞻祈并切鋪述奚殫

賀省副兵部書

恭惟省副兵部蚤紆賢業親造聖辰進位五兵兼造財閫之劇疇庸六典卽登法從之嚴順履一元載蕃百福莫前脩慶第切馳誠

賀中丞唐諫議書

恭惟中丞諫議體凝方重學貫本元危言嘗犯於雷霆直氣欲摩於星斗一誠獻納愈爲朝論之高萬事脩明通底臺綱之正始和戒旦茂祉對時某素被重知適膺煩使茲阻壽觴之奉曷勝頌牘之虔

賀郡牧龍圖呂侍郎書

恭惟郡牧龍圖侍郎玉璫茂閎金鉉慶枝親逢聖神之期自底功名之會文昌貴秩矧兼延閣之華法從邇聯暨屈劇司之委遙臨元朔益介純禧某總計河濱馳誠門下永言企頌曷盡敷論

賀判都水兼龍圖韓給事書

恭惟判監龍圖給事。世推人傑。道覺民靈。步瓊闥之榮班。直珍圖之延閣。智謀有裕。緊臨長於水官。績用其成。行對休於天子。維時開祚。與國均休。某久去朝聯。方提漕節。莫前爲壽。敢後馳誠。

賀新推官書

茲者某官。茂對宸緒。榮從賓幄。顧短才之有望。幸婉畫之焉依。方列慶音。遽貽珍牘。俟諸瞻揖。併述欣銘。

答監稅李學士書

伏念向繇幸會。獲際光儀。鎮執計簿之勞。絕攀臺閣之軌。封壤雖密。絨膝幾稀。伏惟闕掌多餘。神明自復。恭以某官。道先民覺。才爲世生。由妙年而取甲科。不累日而致清貫。書林擢職。誠允公言。利局冗寮。固非久次。靡容秩滿。行被詔還。

代賀監司書

伏以華歲履端。蒼靈布序。審璿璣而考度。揭象魏以頒常。恭以某官。康濟懋勤。融明迪哲。入膺宸綽。出領使麾。方首祚之丁辰。逮屬城而蒙福。永言慶祚。曷任下情。

代賀諸官書

伏以蒼靈布序。華歲履端。揭象魏以頒常。審璿璣而考度。恭以某官。早紆賢業。茂著官能。屬首祚之膺辰。罔自天而集慶。永言瞻頌。曷究敷宣。

代賀呂度支改兵部糾察在京刑獄書

伏審顯膺鴻渥。榮改清郎。矧辱已知。倍增距躍。恭以某官。摺紳碩望。當軸慶宗。親會穆清之辰。累更繁劇之任。進夏卿之秩。方啓於榮途。悉君子之心。以繩於庶獄。佇歸柄任。少副輿言。伏望上爲闕廷。精調寢饋。

與鄉中親知書

某一塵科籍。久偃鄉閭。制除調官。闕滿之局。率繫仁庇。備歷亨衢。銜恩固深。論感非悉。旋營職之鮮暇。致拜音之後時。恭惟順履新陽。誕迎景福。江關千里。已遠於高賢。塵土三年。遂淪於俗吏。未諧諮覲。第極傾翹。

上通判元太博知縣葉太博書

昨者。久偃鄉邦。屢登牆宇。素昧業官之術。多所乞靈。每由請見之間。未嘗無誨。泊遠從於吏役。俄越去于公庥。日戶鞭扑之冗囂。不覺音賸之曠絕。仰惟德履。坐擁休祺。恭以某官。道具粹醇。器函剛實。曲臺掌故。未愜於輿言。片紙垂褒。佇歸于柄任。俛維孱儒。鎮託甄題。伏望上爲邦朝。益綏寢饋。永言瞻頌。曷究指云。

問候府推張都官書

自阻賢規。曠馳書舍。屬寒威之方厲。諒時社之載蕃。伏惟某官。名重儒林。學優聖域。關決都畿之政。聊藉治才。延登經緯之華。行膺睿選。餘祈自厚。少副勤瞻。

代問候發運主客書

近者。伏值駕言屬封道出賤土。幸階守紱之職。屢叩賓閔之嚴。使車還轅。倏爾踰月。官簿堆案。缺然寓音。

伏惟順履新陽。誕迎景福。幹濟多裕。神明頓遠。恭以某官。文章世家。忠諒許國。不由累日之久。力取顯官之榮。上知素明。自結益固。然外臺分寄。誠壽於具瞻。而中展須賢。行聞於爰立。

代上持服魏諫議書

某自叨朝寄。出領州麾。聿有詔條之奉行。寢焉音問之稀闊。仰惟孝履。俯順禮經。恭以某官。元精所生。盛德之後。躋諫署之祕列。將漕臺之重權。中外游揚。屯夷一貫。方隆帝辰之眷。遽遭親堂之悲。頗壽與瞻。尙淹冊拜。矧萬鍾及養。足少抑於哀摧。儻細札奪情。可兩全于忠孝。伏望上爲邦社。精調寢興。

代問候發運主客書

近日。伏值出按屬部。俯經賤封。繇天幸之使然。獲風期之觀止。去德未幾。嗇神諒佳。鎮鞅簿書之煩。絕疎竿牘之問。仰跂標範。第勞悃悵。伏望上爲邦朝。精調寢餽。永言瞻溯。曷罄敷云。

代上持服魏郎中書

某逖阻朝遊。鎮撫郡事。曠奉聲問。仰諮燕興。恭以某官。才貫幾深。量函夷雅。親逢真聖之運。早踐列星之垣。方不世以懋勳。遽終天之遘戚。然德雖欲報。靡極於孝思。矧忠亦可移。庶全於禮制。

上和州余郎中書

近列慶函。繼紆誨牘。倍聆德履。舉集休祺。恭以某官。植操端方。秉心純亮。紫垣應宿。早歷於清郎。秀野班春。聊熙於雅俗。行膺宸選。少慰人言。伏望上爲邦朝。精調寢餽。

上通判太博書

近獲布音。嗣蒙占教。伏審贊行藩政。坐擁天祺。恭以某官。親會泰辰。滄揚美仕。曲臺進秩。矧故事之素明。別乘亞恭。猶清議之未允。佇歸柄任。方協輿言。

與海州倅書

出承吏乏。阻備賓榮。當淮洲囂冗之衝。有官簿沈迷之慮。營職無狀。貢書不時。恭以某官。文章世家。忠諒許國。副車貳政。尙鬱於賢圖。細札須才。行膺於帝簡。

上糾察呂兵部書

近日。嘗貢賤賸。計塵几席。惟按治之多暇。固尊生之有經。恭以某官。當軸令枝。薦紳碩德。早被上心之簡。總詳庶獄之繁。踐往訓之哀矜。莫非慎察。體至仁之欽恤。多所平反。矧陰施之已隆。諒寵褒之非晚。

上審刑李屯田書

鎮靡郡事。逖阻朝游。曠敍暄涼。仰諮寢味。恭以某官。道先民覺。氣秀人靈。早頡頏于仕途。尙淹延於郎署。虔共職事。慎審刑章。抵罪之氓。賴盡心而蒙惠。舞文之吏。皆束手而憚威。矧治狀之有成。加聰聞之甚邇。行甄善課。驟陟清班。

答本州都曹書

自去故棲。向從遠宦。豈圖謙眷。特損音題。恭以某官。植操端方。賦才肅給。勾稽一郡。適藉於幹能。第課三

年行膺於寵擢。永言感頌。曷究指云。

答朱判官書

某自把守麾。曠馳書舍。豈圖高誼。先枉長牋。伏以某官。名世標才。際天蘊識。泛蓮之幕。夙表著於能名。恭梓之邦。洽聽聞於政迹。行甄善最。驟陟清途。永邇傾祈。曷殫崖略。

本縣孫長官書

言念自分符竹。久去鄉粉。舊業一廛。幸棲於仁政。順郵百舍。遽損於誨音。紉玩載周。銘藏無數。矧夙凝於治狀。固上格於聰聞。行迓寵升。倍祈珍攝。永言感頌。曷盡文陳。

代答滁州監稅李學士書

言念竊居藩守。幸邇風猷。如隣洪河。日所蒙潤。不遠數舍。缺然寓音。豈意謙攜。猥貽勤教。暫屈才於利局。行還職於書林。庶順生經。以須詔召。傾祈感篆。匪諭名言。

代上濠州呂學士書

某叨紆守紱。密接侯封。斗疎順驛之馳。日企餘光之及。仰惟坐鎮。俯順生經。恭以某官。文章冠時。纓冕奕世。早躋閭籍之華貫。復列書林之貴遊。鈴閣班條。寧容於滿歲。鋒車祇召。行在於匪朝。

代上糾察呂兵部書

某向廩州守。逖阻朝遊。雖順翼之數通。顧高風之負邈。仰傾德宇。鎮役勞襟。恭以某官。天鍾粹純。世濟勳

業上方倚注。允得民獄之平。時所企瞻。知爲相門之後。行旌善最。峻陟清途。伏望上爲邦家。精調寢饋。

代上發運待制主客書

某自邈崇。塵條經累月。阻奉音郵之問。仰諮德宇之安。恭以某官。器函淳深。術蘊經濟。以外計浩穰之委。暫掌于吏權。矧中宸眷倚之隆。行當於柄任。

代上提刑郎中書

某近貢音。膝仰詢韻宇。惟按治之多暇。固尊生之有經。恭以某官。親遘泰辰。游揚美仕。提綱庶獄。絕吏手之舞文。嚴課中宸。竚上心之嘉績。伏望上爲邦社。精調宴興。靜言翹挹。曷究指云。

代答丁舍人書

郡卑地要。術短事繁。阻奉音函。遽頒教幅。受而伏讀。藏以爲榮。仍審燕興。舉臻禧福。恭以某官。學造聖際。行爲士宗。親逢盛期。獨映華貫。然禁塗載筆。曷究澤民之爲。而台袞輔謀。佇觀行事之效。

代答祕監書

嚮領外麾。遙瞻上笏。豈圖恩獎。首占教文。伏讀以還。兢慚靡措。恭以某官。懿文表世。亮節在庭。中外游揚。明哲一致。台衡著德。方渴於老成。仙室需才。寧容於歲滿。

代上徐舍人書

伏審光奉宸緝。榮持使柄。伏惟慶慰。國家以外臺至重。列郡攸儀。澄序庶官。以判白於賢否。總領大計。以

供億於經常。僉謀所同。明哲惟允。恭以某官。業術精奧。方格淳修。臺閣清塗。聊抑翺翔之勢。金穀重寄。適繫幹濟之才。行被詔音。驟還柄任。

上昌樂縣官書

近觀風期。過承禮遇。旋經違異。頗極傾依。到郡少閒。致書差緩。餘祈清霽。以迓寵恩。感頌之私。文陳匪悉。代上上省邵金部書

伏自拜命宸廷。貳權計省。官簿紛委。使郵絕疎。曠敝暄涼。仰諮燕起。恭以某官。方格修整。業履該明。解麾通漕之臺。遽甄最狀。亞職甘泉之府。允屬時才。矧心計之素明。加聰聞之甚邇。行疇幹濟。亟步近嚴。

代謝知州書

近者祇被宸綬。奉安親樞。暫還素里。數觀清塵。備蒙主禮之優。過篤朋從之好。旋違德宇。適抵治封。方休道路之勤勞。卽有詔條之宣布。傾賢惟日。裁寄後時。矧風績之其凝。佇恩意之不次。尙遙晤對。倍冀遵頤。答仇員外書

早綴下科。寢階冗列。備聞高誼之日久。願見盛德而跡疎。近布勤倦之辭。倍據傾嚮之意。兢畏太甚。舛誤有之。妄指趨廷之賢。謂爲同籍之契。陰須嚴斥。絕覲好音。賴長者優容之深。出小生意料之外。懇諄其誨。矜恕以情。置書袖中。永以爲佩。負荆門下。勢所未能。恭以某官。名高士林。學造聖闢。平時沈俊。領民籍官簿之繁。疇昔著篇。極國體人事之大。行膺褒陟。倍保燕興。感頌怔忡。曷殫崖略。

代賀范大資移鎮書

某以孤生。嘗棲大庇。亟蒙教育之賜。有警懦屏之姿。尋違遠於師牆。鎮奔馳於吏牒。緒言不及。夙習幾還。賴天不棄。愚賢方易。鎮復幸使麾之屬。適當官次之依。善政所施。可日聞於矩矱。短才無狀。庶訖託於生成。恭以某官。鉅業熙邦。雄文表世。出平亂略。入總繁機。挺金石之純誠。尊股肱之一體。輟從祕殿。往領巨邦。已躋雅俗之安。靡俟更書之滿。朝端英袞。行被於登庸。天下蒼生。一歸於陶冶。畢宗臣之能事。光信史之直書。瞻頌傾依。曷殫崖略。

代謝柳侍讀書

特紆公幹。垂貺鈞函。俯親小國之隣。曲損大臣之體。拜而伏讀。藏以爲榮。恭惟臨撫善藩。綏寧泰宇。伏以某官。民靈先覺。王佐偉才。以文章取甲科。以忠誼結明主。華要之選。翺翔殆周。厭預玉堂之游。出領銅符之寄。諸侯之府。矧坐鎮之彌年。上相之廷。行登庸於匪日。

代答劉龍圖書

近塵愚悃。上浼台光。豈謂損體貌之達尊。錫丁寧之勤誨。惕焉拜賜。藏以爲榮。恭以某官。迪操直清。秉心忠諒。公論加重。主知甚明。尙淹當軸之才。聊寄尹京之任。王都億萬之口。翕頌政聲。相階比兩之躋。行膺冊拜。

代上文相公書

託身播物之鈞。生成有素。延首翹材之館。景仰無涯。日爲吏簿之勞。時闕公函之奉。伏惟變調元緯。集受純禧。恭以某官道著將明。量函夷雅。秉尹躬之一德。會舜旦之重華。雲龍協期。圭袞旌德。丹青教化。蔚爲百辟之師。富壽幅員。靡失一夫之所。太平之業。夙夜以基。

代上向少卿書

伏審祇函詔音。榮解使領。孤危晚景。遼遠巨庥。貌如嬰兒。驟奪慈母。叢若疲馬。止思故軒。遐企恩暉。第零感涕。承使旌之就道。阻信服之把麾。敘戀莫前。馳想良極。恭以某官。搢紳碩德。當軸慶枝。幹厚利於邦家。已殫幹略。暢偉謀於圭袞。行被寵恩。

代上文相公書

用人惟舊。鈞宰焉依。亞外諸侯之麾。鎮嬰俗狀。瞻大丞相之府。阻拜台光。伏惟密贊萬機。翕膺諸福。恭以某官。清廟偉器。朱紱正聲。伊尹以道覺民。靈山甫以職裨袞闕。結帝辰之隆眷。踐公槐之絕班。熙然吾氓。登躋仁壽之域。致我真主。拱揖勳華之隆。百辟所儀。四海共賴。

代答呂郎中書

近者。伏值某官。駕言于藩。道出茲土。獲風期之觀止。蓋天幸之使然。展奉良疎。緬懷甚覲。豈圖高誼。先枉珍函。何其賁飾之多。無乃謙撝之過。兼聆近履。舉集龐視。班教善藩。行據於素蘊。拜嘉褒詔。佇陟於清塗。代答陳太博書

伏審解麾炎服。假道淮邦。惕賤候之未能。遽郵音之首及。俛惟弱植。嘗預同升。茲天幸之使然。將風期之觀止。拜塵有自。引領增勞。恭以某官家世名才。朝閨碩彥。曲臺進秩。矧故事之素明。片紙垂褒。諒茂恩之行集。併須瞻拂。以訖惓惓。

代答荆南知府齊學士書

伏審茂對恩函。榮躋仙局。伏惟慶慰。竊以國家興敝祕館。延登偉才。特優承學之賢。乃建載言之職。其應華選。允屬名儒。恭惟某官學造聖微。識探經奧。大筆擅淵雲之妙。卓富於高文。當年飛終賈之聲。早光於上第。對休辰而逢吉。揚顯仕以開榮。參計財閫。茂明經畫。宣風漕節。多所澄清。邁升史席之華。兼領守麾之寄。矧洞庭之樂土。惟荆渚之雄藩。民物素佳。江山尤勝。優游郡閣。足詠中和之篇。陟降王塗。行歸侍從之列。某側聞新命。竊忤寸襟。惕賀牘之未馳。遽誨音之首及。永言感躍。曷究指云。

代問候海州知州書

近被臺移。遠承官乏。企仁侯之幕下。時戀恩暉。供冗職於淮壖。日馳俗狀。門牆且邈。賤牒弗時。伏惟鎮撫善藩。綏寧泰宇。恭以某官郎垣碩德。王國偉才。領麾滄海之城。豈容滿歲。奏課甘泉之府。行擢茂功。

回徐州通判都官書

向者某官久偃鄉邦。屢親標矩。同心相得。喜接高賢之遊。交臂分攜。鎮供冗吏之役。奔走道路。淹回歲時。馳塵想而彌深。奉幽緘而久缺。豈謂弗爾遐棄。兩貽好音。惠愛逾周。雅素皆在。仍審貳藩之暇。益臻素履。

之和。海沂泰康。已騰於輿頌。綈紙迅召。行陟於嚴塗。

回慶成軍高郎中書

伏審紫詔承恩。粉闥正位。伏惟慶慰。恭惟知軍郎中。才猷膺劭。術業修明。刺史承流。方登於最狀。郎官應宿。遽服於華章。軍壘班條。連上頻年之最。星垣進秩。載光列省之文。首貺音函。第增感臆。

與商州閻修撰書

審擇剛辰。已班寬詔。卽商於之便郡。脫炎服之修塗。章懷近買臣之鄉。失馬誠寒翁之福。而況屯夷殊致。明哲惟均。想宣化之多餘。固養恬而增粹。行膺迅召。還陟嚴塗。

代回史祕校書

文試有司。業精諸彥。光外臺之舉首。大華閥之慶餘。垂睨長牋。益欽高矩。卽收名於上第。當得意於青春。餘冀自持。以須大到。

回慶州鈐轄梁文思書

參領戎輶。往臨邊劇。喜獲賢規之接。顧慙主禮之疎。旋審涓辰。已諧視事。首紆榮翰。增戢鄙懷。方外圍之倚才。佇中朝之紀績。餘祈厚愛。以對華褒。

上亳州宋內翰書

恭以某官。學際天淵。名重纓綸。早陪乙夜之覽。允極千秋之榮。謂翔步王塗。未殫行事之效。而班條侯屏。

少見澤民之爲。順履慶辰。具膺景福。宅上台而秉軸。諒在匪朝。祝南山而奉觴。莫遑爲壽。永言瞻頌。曷究名言。

上揚州錢侍讀書

恭以某官。元精所生。盛德之後。紹該治之先業。陟廉良之茂科。華要游揚。聲光愈綽。密侍鈞衡之覽。遽厭晨趨。樂從露冕之遊。已凝風績。靡容秩滿。行被詔還。屬亞歲之膺辰。固自天之集慶。某按封茲限。爲壽莫前。瞻禱所深。名言非諭。

上江寧府皇甫諫議書

恭以某官。莊重自居。直清不倚。間關數紀。出入兩朝。寢隆法座之知。峻陟諫垣之祕。典刑在事。方倚老成之資。藩翰于宣。遽布中和之治。順迎令序。誕擁龐視。瞻頌所陳。名言非究。

上杭州呂舍人書

恭以某官。道具粹醇。體凝方重。早躋仙籍之甲選。久陟禁林之貴游。英袞之暢。偉謀尙淹。大任。晝錦之過。故里。聊請便麾。某適按部。封正遙牆宇。祝南山而爲壽。莫遂前趨。託兼幅以貢音。曷涯下悃。

上運使工部書

恭以某官。王國美才。郎垣碩德。荷續旒之隆眷。方倚兼能。領金穀之要司。尙淹致遠。行疇最狀。驟陟嚴塗。順履令辰。誕膺景福。某按封茲限。爲壽莫前。瞻禱所叢。名言非諭。